



ԿՐՈՆԻՅ ՈՒՍՈՒՅԻՉՆԵՐԻ ՊԱՏՐԱՍՏՄԱՆ ՆՈՐ  
ԴԱՍԸՆԹԱՅԻ ԲԱՅՈՒՄԸ ԱՐԱՐԱՏՅԱՆ ՀԱՅՐԱՊԵՏԱԿԱՆ  
ԹԵՄՈՒՄ

«Տէր, ուղղեա եւ առաջնորդեա,  
գնալ յարդարութեան ճանապարհն  
եւ ի կեանսն յաիտենից...»:

Մայր Աթոռ Սուրբ Էջմիածնի Քրիստոնէական դաստիարակության և քարոզչության կենտրոնի նախաձեռնությամբ Արարատյան հայրապետական թեմում բացվեց կրոնից ուսուցիչների պատրաստման հերթական երկամյա դասընթացը:

Բացման հանդիսավոր արարողությունն անձամբ նախագահեց Ամենայն Հայոց Կաթողիկոս Նորին Սուրբ Օծություն Ս. Տ. Գարեգին Առաջինը: Ներկա էին Արարատյան հայրապետական թեմի առաջնորդական փոխանորդ Գերաշնորհ Ս. Գարեգին արքեպիսկոպոս Ներսիսյանը, Մայր Աթոռիս հոգևոր ճեմարանի վերատեսուչ Հոգեշնորհ Ս. Հայկազուն ծայրագուն վարդապետ Նաջարյանը, հոգևոր ճեմարանի դասախոս Հոգեշնորհ Ս. Գրիգոր վարդապետ Չիֆթչյանը, Քրիստոնէական դաստիարակության և քարոզչության կենտրոնի տնօրէն Հոգեշնորհ Ս. Վազգեն արեղա Միրզախանյանը, Սուրբ Գրիգոր Լուսավորիչ կիրակնօրյա դպրոցի տնօրէն Հոգեշնորհ Ս. Բագրատ արեղա Գալստյանը, Արժանապատիվ Տէր Հայրեր, Բարեշնորհ սարկավազներ, հյուրեր:

Տերունական աղոթքից հետո, բացման խոսքով հանդես եկավ Հոգեշնորհ Ս. Վազգեն արեղա Միրզախանյանը: Նա հանգամանալից բացատրեց դասընթացի գաղափարն ու նպատակը և տվեց գործնական ցուցումներ՝ արձանագրվել ցանկացողների համար:

Կրոնի ապագա ուսուցիչներին իր սրտի ու բարեմաղթանքի խոսքերն հղեց Արարատյան հայրապետական թեմի առաջնորդական փոխանորդ Գերաշնորհ Ս. Գարեգին արքեպիսկոպոս Ներսիսյանը՝ միաժամանակ խորհն



շնորհակալություն հայտնելով ազգիս Վեհափառ Հորը՝ մեծագույն հարգանքի և այդ պահին այնտեղ ներկա գտնվելու առիթով:

Այնուհետև ներկաներին իր հայրական պատգամն ուղղեց Ամենայն Հայոց Հայրապետը: Խոսելով մանկան հոգեկան ներաշխարհի, նրան հետաքրքրող երևույթների, կենդանի ու առողջ մանկավարժությունից պահանջվող առտնին խնդիրների, ինչպես նաև աճող սերնդի հոգևոր ու կրոնական դաստիարակության կարևորության մասին, Նորին Սրբությունը մեկ անգամ ևս ներկաներին հիշեցրեց, որ մանկանը կրթելու ամենակարևոր գործունը սերն է և սեփական անձը որպես դասագիրք ունենալը: Իր հոգում սեր չունեցող ուսուցիչը երբեք չի կարող լավ մանկավարժ լինել և ըստ այդմ էլ անկարող է հասարակության համար պիտանի մարդ դաստիարակել: Իր համառոտ, սակայն այնքան կարևոր ու արժևորող խոսքը Վեհափառ Տերը որակեց որպես առաջին դաս կամ դասախոսություն՝ իր իսկ բառով ասած: Նա շեշտեց նաև, որ մանկավարժությունը երբեք չի կարելի ուսուցանել: Վերջինս նման է Աստծուց տրված շնորհին: Ամեն մի ուսուցիչ, որ հանձն է առնում կրոն դասավանդել, պետք է այն համեմի կյանքով: Ցանկացած մի խոսք կամ արտահայտություն, որ վերցվում է Աստվածաշունչ մատյանից, նախ և առաջ պետք է երեխան հասկանա կյանքում եղող որևէ միջադեպի զուգակցումով: Այլապես դրանք զուտ գաղափարներ կմնան երեխայի համար, որոնք նա պարտավորված պիտի լինի գոց հիշել:

Հաջողություն մտղթելով Աստվածային խոսքի սերմանման դժվարին, բայց քաղցր ու անկրկնելի ուղին ընտրած 150 դիմորդներին, Վեհափառ Հայրապետը խոստացավ պարբերաբար այցելել նրանց, ծանոթանալ ձեռք բերած գիտելիքների մակարդակին, ինչու չէ, նաև ինքն էլ դասախոսել, եթե ժամանակը ների:

Մեկ անգամ ևս դիմելով ապագա սերմնացաններին, Մայր Աթոռ Սուրբ Էջմիածնի Քրիստոնեական դաստիարակության բաժանմունքի վարիչ-տնօրեն Հոգեշնորհ Տ. Վազգեն արեղա Միրզախանյանը հիշեցրեց, որ հաջորդ շաբաթ, երբ պաշտոնապես հավաքվեն առաջին դասին, ոչ ոք թող չմոռանա օրվա հետ առնչվող մեծ խորհուրդը, քանզի հենց այդ օրը տոնվելու է մեր թարգմանիչ հայրերի սրբալույս հիշատակը, այսինքն՝ Թարգմանչաց գեղեցիկ ու իմաստալից տոնը:

«Պահպանիչ»-ով և «Հայրապետական մտղթերգ»-ով վերջակետովեց անդրանիկ դասախոսությունը, որը նաև լսարանի բացման երկար սպասված սրտառույչ հանդիսությունն էր:

**Մ. ՎԱՐԴԱՆՅԱՆ**